

TEATER TRADISIONAL BORIA “KEMBARA BORIA – SATU PERJALANAN”

KUALA LUMPUR, 23 Julai 2023 – Kementerian Pelancongan, Seni dan Budaya (MOTAC) melalui Jabatan Kebudayaan dan Kesenian Negara (JKKN), terus komited dalam menyemarakkan dan memartabatkan seni budaya negara dengan pelaksanaan Panggung Seni Tradisional 2023 atau singkatannya (PST2023). PST2023 memasuki siri ke empat (4) dengan persembahan “**Kembara Boria – Satu Perjalanan**” karya Persatuan Seni dan Budaya Era Baru atau (MANES). Menerusi persembahan yang dilaksanakan bermula 22 - 23 Julai 2023 ini, penonton akan dibawa mengimbuai sejarah perjalanan seni Boria di negeri Pulau Pinang.

Boria adalah sejenis teater yang amat popular di Pulau Pinang. Persembahan Boria yang lengkap mempunyai dua segmen iaitu sketsa dan nyanyian. Nyanyian Boria diketuai oleh seorang tukang karang yang kebiasaannya akan memegang tongkat penunjuk ketika menyanyi. Rangkap karangan Boria mempunyai hujung suku kata sama dengan setiap rangkap kisah yang berkaitan dengan sketsa dipersembahkan. Enam orang dipanggil ‘Selor’ yang berada di belakang akan menyanyi dengan mengulangi rangkap pertama nyanyian tukang karang. Alat-alat muzik Boria pula berubah mengikut peredaran masa, namun penggunaan viola, marwas, gendang panjang, akordion dan harmonika sangat digalakkan dalam persembahan ini.

Menariknya penceritaan menyelusuri “Kembara Boria-Satu Perjalanan” ini, penonton akan dibawa mengenali persembahan tersebut dengan mengungkap permulaan asal usul Boria yang dibawa masuk ke Pulau Mutiara ini ketika era pemerintahan kolonial British dahulu. Kemudian beralih kepada Boria Kampung yang mendapat penyertaan daripada kalangan penduduk tempatan dan bagaimana boria mula dipersembahkan di atas pentas sempena pesta keramaian. Malah, penonton juga akan disajikan dengan tarian-tarian yang telah dikreasikan dan pemuzik menggunakan pancaragam

atau '*band*'. Lagu-lagu yang dihasilkan pula disadurkan dengan genre yang popular pada ketika itu.

Penonton dapat melihat transisi boria dalam segmen keempat apabila ia melalui fasa komersil dengan melangkah ke saluran media seperti radio dan televisyen. Di sinilah sketsa Boria yang mempunyai ciri serta konsep tersendiri bermula diperkenalkan. Boria Moden melabuhkan tirai "Kembara Boria-Satu Perjalanan" pada segmen kelima dengan persembahan *finale* yang memaparkan kemunculan pelbagai jenis kumpulan daripada kampung atau persatuan-persatuan seni yang ada di sekitar Pulau Pinang.

"JKKN sentiasa memperlihatkan keindahan kebudayaan dan kesenian tradisional masyarakat majmuk di Malaysia dalam setiap siri persembahan dalam Panggung Seni Tradisional (PST). Program ini bukan sekadar persembahan 'sehalu' tetapi merupakan serampang dua mata kepada kumpulan atau persatuan seni budaya untuk mempelajari pelaksanaan sesebuah produksi bagi sesuatu persembahan. Program ini merupakan usaha bagi memastikan kelestarian seni persembahan tradisional dapat diteruskan. Ia juga sebagai langkah pemeliharaan dan pengekalan seni warisan negara yang berupaya menjadi serampang dua mata dengan menjadikan Kuala Lumpur sebagai hab persembahan tradisional dan salah satu produk pelancongan negara", kata Mohd Amran bin Mohd Haris, Timbalan Ketua Pengarah Sektor Dasar dan Perancangan, Jabatan Kebudayaan dan Kesenian Negara ketika menghadiri program itu tadi.

Bagi mendapatkan maklumat dan keterangan lanjut mengenai program ini, orang ramai boleh melayari media sosial JKKN melalui pautan <https://www.facebook.com/PanggungSeniTradisionalTraditionalArtsShowcase?mibextid=ZbWKwL> atau www.facebook.com/mysenibudaya dan www.facebook.com/PanggungSeniTradisionalTraditionalArtsShowcase

-TAMAT-

Dikeluarkan Oleh:

Unit Komunikasi Korporat

Jabatan Kebudayaan dan Kesenian Negara

Tel: 03-2614 8200 Faks: 03-2697 0786

Laman Sesawang: www.jkkn.gov.my **E-mel:** ukk@jkkn.gov.my

Platform Media Sosial Rasmi JKKN:

Facebook: @Jabatan Kebudayaan dan Kesenian Negara dan @mysenibudaya

Instagram, Twitter & YouTube: @mysenibudaya

Untuk Pertanyaan, Sila Hubungi

| | |
|--|---|
| Mazidah binti Mustapha Pengarah Unit Komunikasi Korporat, JKKN mazidah@jkkn.gov.my Tel: 03-2614 8200 / 012-952 2095 | Eldawati binti Laung Pegawai Kebudayaan Unit Komunikasi Korporat, JKKN eldawati@jkkn.gov.my Tel: 03-2614 8200 / 019-8091805 |
|--|---|